

Flurin Caduff-Brugger 1929-1998

Glion - Camischolas

Il Flurin dalla Gada, sco el vegneva numnaus en Tujetsch, ei buca pli. Sesentend buca propria uera ed ina pintga attacca dil cor pren el ina cuorta dimora el spital a Glion. Serestabilius tuorna el a casa. Mo ils 19-07-1998 sepreparaus per ir a messa serepeta la disdida dil cor per la secunda ga, bia pli ferma e tschancuna la veta tut anetgamein per adina. Ina frida nundescrivibla per sia cara consorta, ses cars affons, frars e soras, parents ed enconuschents. Cun 69 onns bia memia baul. Mo lein seconsolar culs plaids; il Segner ha dau, il Segner ha priu, il num dil Segner seigi benedius. Quei dat curascha e forza da purtar quella greva crusch.



Il Flurin ei naschius ils 4 d'uost 1929 a Camischolas. Ses geniturs eran Gion Giachen Caduff da Rueras e Maria Gada naschida Venzin da Selva. Flurin era il secund vegli d'endisch affons, dils quals vivan oz aunc 8. Strusch che Flurin ei ord scola, piarda quella gronda famiglia il bab. Onns da scartezia e pauca lavur per ina vieua cun 11 affons. Aschia ha ei tuccau als pli vegls da segidar cun la mumma e trer si ils pigns. Tier quei grond pensum reussescha ei a Flurin da far gl'emprendissadi da miradur e pli tard la scola da capoluvrer. Cun sia emperneivla curtesia, sia diligenza e luvrusadad eis ei reussiu ad el da survegnir 1960 ina piazza tier l'NOK sco survigilader sin differentas piazze da lavur. Da 1960 tochen 1970 tier l'Ovra Rein Anterior KVR. 1970 tochen 1979 tier l'ovra electrica da Sargans KSL e 1979 tochen 1994 tier l'ovra electrica a Glion KW1. Allura ei Flurin ius en sia beinmeritada pensiun.

Gl'onn 1963 marida nies car Flurin la giuvna Martina Brugger da Rueras. La lètg ei benedida cun treis affons, dus fegles ed ina feglia. Per sia famiglia ha el giu bien quita ed ei era sia luschezia. Els ein secasai a Camischolas, plitard a Vättis e lu a Glion. Possedend ina casa a Camischolas ed ina habitaziun a Glion era el meinsvart a Camischolas e trafficava vid sia casa. In grond engraziamenti pil bien alla beadia Marion duront che sia mumma era malsauna. Il Segner vegn a remunerar quei a Ti dublamein.

Hobbys e lavur publica

Da giuven ei Flurin staus fetg activs e sportivs. Tier ir cun skis alpin era el era in amatur da cuorsa liunga. Tier bia cuorsas, stafettas e patruglias has Ti fatg part e purtau bein enqual arbagia per la Val Tujetsch. Dil cussegl d'administraziun dallas Pendicularas Sedrun-Rueras SA has Ti fatg part cun lavur, plaid e cussegl. Era alla

societad da musica Sedrun eis Ti staus in bien commember. Dapertut tier Tias activitads has Ti prestau lavur entira. In cauld engraziament persuenter.

Car Flurin

Tia vasta lavur mereta grond engraziament. Quella pagaglia vegn il Tutpuissent a dar a Ti. Nus tuts, tia famiglia, Tes fargliuns, parents ed enconuschents lein tener Tei en buna memoria. El santeri a Glion ruaussa en pasch e spetga sin la levada gloriusa. Stei bein e sin seveser.

Pally Vinzens